

開放文學 – 神鬼仙俠 – 天妃娘娘傳 第二回 玄真女得佛真傳

但見夏日炎炎，涼風拂拂，西王母正在瑤池之上，擁從三四仙女，玩賞一場。忽見玄真巽順下風，膝行而前。王母啟言問曰：「汝是何方神女，甚故竟入瑤池？倘有所教，不吝言之。」真因稽首再拜，俯伏言曰：「聞至聖乃大生廣生之母，不生不滅之宗，胡藉資而不有，匪逆背面能全。臣乃北天妙極星君之女玄真是也。近因碧池苑內，捐變紛紜，故不遠千里而來，欲為去暴除殘之舉。望聖母撥迷入悟，功德阿彌世界。」王母微笑言曰：「不同道。此乃逍遙之境，吾乃快樂之仙。汝何不南海見觀音菩薩，彼自有法授汝。雖然，汝雖生長玄宮，口精元實，孕毓未足，受法無地。吾且授汝靈丹一顆，即吞服之，可倍益元神，始能聆受心法。」遂命葆真仙女往瑤宮裡取出靈丹一顆，付與玄真。真拜受之。此仙丹真個難得，有西江月（此處原缺兩面）在在無罣礙。

真不得其問，只得合手站立，屏氣返視，移時不動。觀音知其來意已誠，遂現真身。端坐蓮台之上，童男童女，分列兩傍。真望顏拜伏，稽首言之曰：「臣日者為災害並作於家，謹拜王母之池，得授懿旨，推尊慈佛，大設慈航，永渡苦海。」觀音曰：「汝知之乎，向碧蓮苑中為孽者非他，一乃世尊座後鐵樹上彌猴精也，一乃雷音寺裡齋供堂所懸木魚精也。因正月十五世尊在凌霄殿宴飲群臣，監樹、守堂二豎偷閒遊戲，被伊逃脫，密藏在爾苑中。今為汝所激，奔走入凡。向禍及物，今禍及人，向為禍小，今為害大。居，吾語汝：猴性好木，乃東方之木妖也，今吾法眼觀見，逃入西方，西方屬金，金能剋水，猴已失所據矣，其為孽雖大，而不能久；鱷性好水，乃北方之水妖也，今觀逃入東南，東方屬木，南方屬火，水能生木，水能剋火，彼能生能克，而不為所生所克，鱷惡除末易也。雖然，邪正不兩立，邪必為正勝。吾今授汝真言，登壇演法，汝可牢記。」時觀音口唸經咒，足步法文，因以手指真曰：「汝當如此如此，即可係彌猴之頸，喪妖搏之魂矣。」真因服王母仙丹，聰明日益，便點便化，無再問言。觀音已知其默識，因戲之曰：「汝也，非助我者也。於吾言，終日不違如愚。」真對曰：「我佛妙傳，如呼夢者之覺，提盲者之途。真雖不敏，請事斯語矣。」觀音笑曰：「善哉！善哉！何處得來。心過明鏡，那染塵埃，普濟生靈，永離苦海。」語畢，因授真團盒兒一個，上圓下方，鐵馬一匹。盒上有詩一首云：

逃難逃方外，出不出圓中，
總在六四內，腳根在震宮。
鐵馬腹上亦鐫詩一首云：
氣受山川腦，形全文武功。
飛江從一渡，西建且東封。

觀音因囑真曰：「此兩物無事則密藏之，有事則資用之，物即是法，法即是物，此法此物，見物見法。汝行矣。」真遂將盒兒拳拳服膺，即望蓮台拜謝曰：「法無量，智也，誨不倦，仁也。仁且智，佛外無佛，聖中無聖。」仍再拜稽首畢，飛乘鐵馬，欣向北天而回。有西江月為證：

靜坐三更寶月，獨葆一種靈株。真鉛才點便歸虛，坐證涅槃妙處。
凡塵盡掃而清，妖氛輕除而去。稽首聽皈依，快樂逍遙無此。